

飢甄洞藁

五十二之四



漢書門類	
一〇四七四號	函
六六	架
二〇冊	冊

內閣文庫	
漢書類	函
一〇四七四號	冊
六六	架
二〇冊	冊

內閣文庫	
番號	漢 10474
冊數	20(20)
函號	317 80



龍瓶洞藁卷之五十二


武昌吳國倫著

齊安王同軌校
新安方尚贊校

書四十首

報徐子與書

淺草文庫



今足下年六十矣六十豈足為足下壽而二三兄弟
未有踰六十者則六十惟足下亦異數也又計八月
誕辰足下有監試事而禮意不能達故先期馳使三
千餘里少效松柏岡陵之祝惟是足下取天地萬物
之精貯之方寸而吐其華以昭示千古蓋所謂貴不
以爵壽不假年也且官晉三品齒臻六十在二三兄

弟以爲異而自衆士論之卽尊貴如五侯長生如彭
聃豈足異乎所鞅鞅於足下者抱子稍遲耳然亦有
命幸且需之敬美已出爲江西少叅元美與象尚守
故秩犬子工良試稍前列亦足下激勵之功內人不
習水土業已遣還里中大梁職務本不甚勞頗爲文
債所苦日內又有兼役真夏畦也所遣吏邵武丘
醫官行回途幸與之一騎

復胡懋中少叅書

頃得贈言二章蒼然古色無異載九鼎而入
帝庭也十年旅宦真如夢千里趨朝未是歸同病之

感深矣行子渡河暫憩衛源以了計吏正簿事相望
憲府只尺不可追攀再數日可與趙使君齊軌而北
計非長別不作岐路之悲如何如何

報吳元石方伯書

海上執鞭叨承厚遇且是時寇患方劇諸城危若纍
卵公親提一旅談笑而靖之鯁隅之民活自虎口而
國倫亦遂得從間道生度庾關以至于今公之爲賜
弘矣回憶舊事髮猶指冠別去五年無便一通私愴
薄德爲甚茲有天幸公且馭鶴駕以臨中州二室三
川藉以增重吏人趨迎先此承候尋當躬負韉矢延

竹清塵

報張肖甫司馬書

解自大梁如釋迦垢歸後稍得杜門習靜一撤舊痾
中間雖有徙居之勞然卑室短垣無所求備殊不作
苦久之又孑然園居矣天上故人久絕聞問惟有停
雲之思偶敝鄉石戶曹來得足下長書而又分俸解
衣萬里相恤此情蓋與海岳俱矣喜慰何可言此時
旌節尚駐雲中非久且得晉佐司馬之報此自足下
具文武才而資望功伐土當聖心下符羣望異日載
績旂常垂光史策為一代名賢稱首是大願也所寄

李遇春誌銘情文竝致其人雖死不忝為布衣交弟
當別為小傳表章之岳麓道院記冥悟禪旨發為宏
詞非隋梁以後人能道今足下雖不離世業已超然
解脫自見本性固自與出世同所謂宰官現身有以
也戶曹還京率爾報謝二詩書在別卷幸鑒之

報王元美書

三月得見慰書兼有珍貺用情厚矣弟之罷也猶自
謂晚無復憤憤意昔許由不受堯之天下趨過逆旅
人逆旅人亡其皮冠而疑由之竊之也由不為少辯
今弟何敢望由而天下之為逆旅人者多矣曾足與

之辯乎山中薄田僅充餽粥而一室如斗日以萬卷
為羅鄙性亦適兒曹經術漸明稍有繼聲之望四方
詞客亦復時時見過小飲微吟不甚落寞雖以垂橐
懸磬終其身不失為故吾也足下名世才未竟展布
且政府相知無恙尚一勉就安車如何

與李于田大尹書

中州回車病懷甚適如道暍者之過非負擔者之息
肩一無所恨獨恨不及別執事與趙司理耳別後聞
兩君益進於雅道又恨不及遽見而欣賞之至於吏
績稱異等固自執事之常久之不調殆有時焉亦不
足為執事詫山中寡營以種樹灌蔬為日曾不知貧
賤之外復有何者為可羨幸明公毋以為念倘得寄
我新詩即不次於抵掌耳

復王敬美書

還山後逆知足下必有專使相問久之不至度必從
部使行郡無間作見懷詩也訊之來使果然果然不
佞於諸兄弟中物忌最甚其以今日罷猶望外事即
年來病憊不任驅馳方自引未決忌者為我一割而
解之脫然愉快又安問其言之情不情哉古者去國
不必潔其名至人之旨達觀齊物竊嘗請事斯語矣

足下深以爲念而三歎不休用意誠厚非不佞所敢承也山居數月頗復豪於花石詩酒間不減鐘鼎雖室如懸罄買山無資猶足自表見無愧也它又何問焉

報徐明叔中丞書

國倫頃以聞謗之日去大梁比還猶及視殤子入土居里中月餘野性稍適而故所患一切疹疾脫然去體拜流言之賜厚矣抱膝長吟杜門待盡敢復問其經不經而又安用測其幻不幻乎惟是明公綈袍之念不遠千餘里專使相存似謂非其罪也而猶有所

託而寬之也仁人之言哉國倫誠薄德終其身不能忘矣前惠楚志本甚華美得之甚珍第其中似有二訛傳恐遂失實方圖細閱小效所知屬歸裝不能攜已爲好事者留覽倘笥中尚有可分者乎武當之約心神已往俟乘秋期躡躑以從諸不瑣瑣

報子與書

杪冬附吏人數行尋改歲矣跂望匡廬幾欲超距而野人之迹固自不能近冠裳鬱鬱有懷何時可慰佳稿凡再閱始能小效其愚然求之大備矣顯人馳上幸覽裁

復劉子成中丞書

往自明公解軍符歸也世莫不爲宗社惜才迺高識之士則謂明公得諸天者厚不必盡用於世而用於不朽以及其子孫國倫蓋私心羨慕之十餘年矣昂藏一官垂白始解尚自恨晚明公猶以爲屈而憐之乎還山以來坐臥圖史所與朝夕非執經之門人則談藝之社客疏食短褐晏然忘貧卽不能仰希高風而鄉黨自好竊已附其後矣他復何豔焉久擬修一介之間於謁者屬數月之內併舉骨肉四喪遂爾因循負其初意徐司空已沾卹典若得明公遠來會葬

其重益增國倫當爲御素車而前矣使旋草復諸嗣致

報元美書

見和古詩讀之淚下不止婁江茗水師友兩慕望之日在目中生不一省死當作負心人豈其忍乎移居稍定便治舟往矣汪惟一遠來乞傳業已許之然不得行狀諸所未詳倘足下作碑先成幸速寄示千萬頃辱足下屢問拙稿且欲冠以名言殊感雅意第自顧生平所著大半未安非攜就足下商確遽授剗劂尤非所安也海內所稱六子惟吾兩人尚留喘息於

世非但往事不必復談卽目前身後俱達者所當一
而化也惟是兩人不一再聚似爲虛生卽弇園中不
著吳郎一屐跡恐乾坤亦無此理俞仲蔚向約同入
弇園玩諸古帖古畫今仲蔚又先我爲異物傷哉足
下謂爲遊客所苦然此輩竟不可絕自是俗緣第雖
貧每遊客至分脫粟之飯與之共飽亦不敢有厭心
且藉此以送餘日特不能效子與之泛愛耳足下謂
何

復陳中丞書

空谷晏眠足音罕至忽吏人挾我雀羅而入投之手
書儼然自天降也喜慰何可言省會來肯寓情太厚
盖旣略其疵累又從而惋惜之拭泥淖而沃以芳香
解塵垢而被之華袞殆類是矣其如此身之難潔何
愧感終身勉當自好達觀齊物古人我師邇但杜門
坐萬卷中與諸弟子畢進修之務暇則蒔卉灌蔬從
社父老飲耳迺握蘭之餘臭倚玉之末光則時時襲
五內而照四隅何日忘之吏旋率爾答貺幸裁察

復大司成許公書

還山後再奉曹使君致書知閣下念三逐臣甚殷也
迺國倫不習爲吏而又善病無以結世人之歡雖徼

福流言以去猶有餘愧何修可比注司馬王中丞哉
閣下憐才不擇而及國倫卽國倫知所重而立槁山
中不爲賤矣大司成著進賢冠爲朝廷更老詔無此
面勿問天下學者師顧復不免之陪京豈非閣下意
耶山中微有傳聞益用感服遵養時晦以俟河清異
時有爲閣下紀相業者此第一義也胡茂承至具悉
起居慰心爲甚向辱謬委非敢遲遲以閣下當代宗
公觀於海而難爲水山中稍暇輒綴數言謹因茂承
之便附償宿逋惟閣下命之幸甚

報沈君典太史書

國倫嘗聞教於尊公矣顧自鹵莽於學而支離於辭
卒無以當事要爲世口實退而省過不盡負世人然
負尊公甚也間從搢紳先生聞尊公有子天下才輒
恨不及須臾就見之已果褻然爲舉首於廷內振
家學之緒外應王國之禎國倫雖在田間不勝私
喜良謂尊公有所託而不朽而世教與社稷之運
且嘉賴焉乃足下侍從未幾而登臨之跡徧江左有
舉世所不解而國倫獨以爲道然者爲其心能出世
必其才能用世非但無相妨也忽枉來訊兼示諸大
篇不面而授人以心自古亦鮮矣國倫以朽棄得之

足下徼福不已泰乎感激感激劉山人業已莫逆至
稱經綸實學而以國倫當之大類張楚語足下慎勿
過聽非其所敢當也劉使且北遽索報書率爾不
知所謂二詩書扇頭用答來貺幸不吝繩削萬千

答劉長卿山人書

向與足下別於郊期獻春再至未幾得手書改期中
夏業已齊沐俟之竟又隔歲清塵杳然可勝延佇使
至乃知東遊之駕初息旋爲經界滯留非果遺不佞
也把書數過不次面談乃足下稱異人江黃間而以
不佞當之顧不佞未免爲鄉人宜諸名公不見信卽

沈馮二子頷之恐非心許昔田單尊一賤卒爲神師
謬恭敬之卒用以破敵足下豈用其術乎乃不佞聞
教以往不敢不勉矣願足下翼而成之沈君典天下
才也而又善承家學不佞所素慕每以不得託交爲
缺事今以足下游揚先枉聞問且讀其詩多超然世
外語殆所謂神交乎率爾報書附使者轉致却寄二
詩錄在別幅幸覽教

答李師孟方伯書

弟能薄數奇棲棲二十八年而後反其初服亦晚矣
夫復何言獨謂不蹶於山而蹶於坵時命旣舛物情

巨測故人遠以爲念得無謂是乎海內弟兄時時寤寐而融赫之墟一時十五人今強半存耳別日苦多流光如駛晨星殘月相照幾何今昔之懷不可道矣杜門以來眠食差勝但三年喪一子兩婦又僮僕十餘人皆暴卒妻兒輩遂惑形家言以爲相宅不吉鹵莽圖遷顧經營無資至鬻恒產以佐之室未及考而力已竭矣不亦愚乎抱甕息機舞斑娛親皆吾楚長老故實吾丈兼之而玉樹如林纓綬照耀百順之福大爲士林所歆何論吾楚迺兩稚子厯厯學步安敢望公家千里駒使還報命諸幸財察

奉方兆行大司馬書

別自戊辰奉書自丙子一臥空谷遂如異代卽音郵渺不易達況欲望清塵乎海內素交類多操衡綴纊以爲情態重輕而僕亦少明於止足之義於人不敢求多乃明公終不知僕之不肖也進欲加滕退則爲之扼腕使僕雖蒙污鱗猶有剖心以相明者則明公友道之厚風之也且自明公入朝經文緯武中外晏然稱治平僕得席此休風與田夫野老擊壤鼓腹卽藜藿甘於列鼎薜荔艷於文繡敢忘所自耶仰望台儀迴在天上撫今思故雲物含情偶門人程雲赴京

便附致起居諸不及萬一

復潘時良司徒書

六傳已駕還朝有期客履盈門父老在御此何時也
猶及以田間之人爲念耶感公高義不知前有鮑叔
矣中山君入坐已爲圖書增色而又衣以文縠厚之
酒資使得優游詠歌誰謂田間之人貧且賤也敬謝
敬謝弟日內便欲鼓棹東下孟夏之杪必能握手弇
園弇園主人聞之當喜而不寐矣使旋草復諸不罄
陳

答萬審理書

高才誨如古亦有之而臨海行能復爾異等難乎免
於今之世矣乃國倫何敢自附公後而公齒頰之耶
曹生藉公爲資以游諸大人長者比來誦公之義甚
具又謂公日苦執筆之役而不見厚遇當事諸公嗟
乎彼豈誠好文者哉誠好之則穎脫於趙璞剖於荆
何王之門足以容公哉此又助鄙人一扼腕矣園居
寡營頗懷同調之感千里見問破我寂寥楚然心喜
之至割所珍見貺非其宜耳倘乘秋見訪之興不孤
鄙人當腰鑱刈葵脫巾漉酒以俟之

報曾司空書

石工既往一月餘聞漢水沸甚恐為行是者憂且以
憂園人也此時想當底定如何

寄黎惟敬書

還山後聞足下請老而南已又聞足下出京當之吳
訪元美之楚訪明卿而後南也業已除一室布几榻
盤盂其間以俟枉駕共醉乃踰歲莫知所之又踰歲
始知徑從豫章度黃嗟乎生平知己垂老長別能不
一顧數語豈足下能安哉弟自免歸數年舊業不廢
而舊病則盡去體近治一蔬圃自灌自給雅能忘貧
其在足下高蹈清風又可知矣賢郎入補天曹大愜
士望足下所未究者都可付之便當弄雲霞撫光景
以送餘齒它無足營不獨少年伎倆可盡捐也如何
如何

與鄭汝志僉憲書

為別二年得書白數千里外暫如面語喜慰已不自
勝而又分我酒資何用情過也扇頭新詩居然大雅
持示友人罔不心折一日千里如公無卻步矣楚自
騷經稱詞賦祖先達數輩號力追作者然可指而數
焉至如吾州此道未振即楊郭二僉雅志好古乃人
僅數首久之無傳僕竊不自量從事于茲三十餘年

又以才不逮人違衆孤立徒取姍笑乃今得公高明起而一振之有如猛將出師僕得執鞭負弩爲之先驅力稍易矣僕近治一蔬圃在北郭外向乞武夷蘭草望之甚殷希留意

報陳在璞郡丞書

鍾陵夜覲十五年語猶在夢中是時公著述業已成家而僕嘗謬爲點定不謂令兄先生竟失此本使僕徒勤數十日之力不得自效於記室豈神物不易合耶抑爲今日地也比者得放山居野性稍適政念海內一二知舊獨楨伯與公尚在仕途幸楨伯聞問不疎而公則遼絕幾如隔世迺春陵長鬣之士遠過山中展翰誦詩情溢楮墨絜然喜生數千里如一室矣感念復何以云佳集宏麗足爲藝圃奇觀欲贊一辭恐非所任重違教命勉當圖之

答徐行父憲副書

大梁之役碌碌無謂迺得託交門下披露古心則生平一大奇也顧鄙人受性戇拙動觸猜忌天下人共齟齬之而明公獨信以爲無它尤不解所自徼福流言始得脫然世網之外野性一縱病骨漸蘇日飲宗老社長間甚適暇則與一二後生談經說枕晏然忘

貧不復知鐘鼎山林孰貴賤矣明公尚以為屈而憐之耶明公由分陝入閩山中得信甚晚春來夢明公儼然見過抵掌抗論如在陳許時既覺竊復不勝梁月之感豈意數千里外歛焉書來謂不神相通耶省會來旨益銜高義大梁贈言初以憚遠失寄已又恐山中人言不足為世重故遂因循至今茲辱再徵旋當圖之內子粗安兒輩學而未達直須俟命迺新婦抱孫或有期耳明公愛我不遺其私甚盛德也敢以相聞

寄周子禮愈憲書

京邸辱吟唼非獨不以眾人遇之為感深矣非久公自內卿外補士大夫竝以為異而弟則竊有所聞藥言難餌直節易疎此一行也公之所以為九鼎大呂也山中廢人何敢復論天下事所望正人君子力肩吾道底柱中流不於公屬而誰屬乎

報元美書

三月十日業已擔囊入舟鳴榔于揚子脫屣于姑蘇臺矣會冢婦病且急為兒子強挽越十二日病者竟化後事甫具又為之卜襄遂巡朱明遂癘暑不能作襍穢子矣足下得無謂國倫食言多而增肥乎人事

齟齬山中猶然何但世路足下當諒我耳今不復敢
爲期然不拜老師墓是負恩也不詣弇山園竊觀所
豔慕是自聾聵也明春必行卽足下以起家出亦不
復問主矣

再復陳在璞書

前月附使者報書足下而使者復自楚反乃取佳藁
細閱而僭序之序苦不能爲浮譽語蓋恐識者以爲
相知未深也大率足下詩得之任天者多而思不必
甚苦構不必甚宏總之以麗藻勝初情以采擬勝自
匠故有合有不合卽合者亦不勝其雷同投之時輩
則膾炙不遑方之古人則瑕瑜不相掩屬使者不能
少留遂不及遍閱乃其大槩如此矣聞已奏記乞
歸果爾則心境俱寂請從暇日一洗而精之要在可
傳不必多也僕辱一言之知至傾虛懷下問遂敢吐
露期於相成幸亮至於國朝文體僕至今未有定
論故亦不敢爲足下贊一詞幸質之惟敬何如

答子厚宗侯書

頃國倫宦游大梁蓋已聞唐邸公族之賢有如君侯
父子者雖東平弘雅西園藻麗不相遠也顧以斗筭
之役奔走拘攣不及一問南陽之路以覲所欽而畢

其所欲請久之且裹足而逝矣歸臥三年寤寐又如
隔世豈知遊談之士亦有以不肖之姓名聞於君侯
者乎周使致書來自二千里外省會詞旨不啻神交
卽藉海內二三大夫徼福知已而國倫則珠犢之魚
目駿市之凡駘也獎與大過寧不增慙謂脩三閭之
舊業以挹二南之遺風竊有志焉而未逮矣辱贈瑤
篇重如鼎呂薄言往報惟君侯命之

答存甫宗侯書

得君侯書與贈詩讀之如與漢唐人共世而又受質
家學冠冕儒林鄙人私心辟易爲甚嘗憶漢辟疆路
少子政子駿竝以宗室父子精專經術儒林以爲美
談今從賢橋梓視之不少遜焉乃鄙人初未嘗有接
塵之遊而又不能走一字爲介紹而君侯不遠數千
里特致殷勤且自忘其有國而執禮過卑鄙人何脩
冒茲靈貺惟是梁楚同風氣求聲應操朱絃而志在
山水截羌竹而音叶雌雄神理所通異域一室使君
侯日賈勇而進於是鄙人願爲執前茅耳何敢當北
面師禮哉別有蕪言用答來雅惟君侯裁察

答周象賢紀善書

頃者再過梁園殊重舊游之感蓋二十年如一瞬而

握手談秬杵不可期卽其鄉子中大夫又遘家難負
沈痾兩造其廬業已頭岑岑不勝揖讓矣可勝嗟慨
哉幸執事瑩精詞翰晏然爲王門重客而鄙人亦復
以其餘喘歸田間甘藿食而錦布衣猶有微適乃班
荆道故之思則未嘗一日置也千里檄書使來辛苦
古人高義今再見之至割所珍以見貺豈從賣賦來
耶用情過矣過矣夷門左席竟虛玄嶽高興未已屬
有徙宅之冗且不及遽從幸執事強飯俟我

與徐伯繼給舍書

比年京師酒禁方肅雖素所親昵故舊不得與遠臣
交一談公獨攜壺過從慷慨高論至夜分不倦國倫
感心知深矣顧又微及時事皆世人所深避而不欲
聞彼其時雖無耳在垣而公之奇氣英節業已槩露
國倫蓋知公之必不免也別未一年遂聞被嚴譴以
出海內士莫不爲公憤惜何但國倫迺天意厚公與
公之自厚在茲行矣國倫脫屣以來野性甚適雖非
明哲幸不老於迷途公何以教之

復王敬美書

入吳之念積已二十餘年而歸後更決謂不能作負
心人也況益以子與之痛乎足下以大義見激恐其

詹甫川夢
卷之三十一
十一
遲遲則可至謂毋令人言成悔則似未相知心憶僕
初解褐時卽問詩子與因卽介子與入元美于鱗社
故平生德子與甚深後于鱗評詩時躋子與時躋僕
僕皆安之意于鱗無它心也若曰僕有境外交而于
鱗心薄之則于鱗大謬矣向見于鱗書語及謝方伯
事僕不識謝方伯爲何人已追思僕理歸德時射洪
謝中丞適撫山東與歸德守陳君同年書與守云欲
傳當代諸公詩所得李王宗徐者多獨明卿不數首
幸爲多索見寄其寓書於僕亦復云然僕始錄近體
詩一卷可三十餘首附書太守報之尋遣一介往問

于鱗遇順甫於濟上順甫見介有病容止之曰此去
濟南尚數日若難卒往吾爲書報若主而若所持李
公書幣吾爲攜致之便比遂以順甫書還會于鱗見
謝中丞談及僕詩且知有書遂疑僕使使中丞而不
及已以爲有外交且誤中丞爲方伯此于鱗大謬非
僕敢以人而罔鬼也向嘗語足下燕邸中而足下不
能聽主先入而薄我我何愧焉若謂急外交而以詩
求傳於人今今親楊使君爲具楮墨戒工役者三年
且乞敘於元美許之意非不耽耽也僕猶自愛未敢
輕出一牘又何謂耶僕於海內二三兄弟庶幾處情

多厚於文雖足下有不盡知者乃處勢苦不及人而迹近薄僕且奈何至於談稅各隨其才定論當在身後幸解疑畜我千萬敝居移舊成新費不易給鬻田過半克之入秋後稍可遷處爲幼兒畢婚禮耳分俸之惠敢不拜嘉敬謝

奉大司成許公書

客歲之初附書胡茂承併以小敘報命計徹覽矣茂承故多顯者遊乃獨輕數千里冒風雪重來挾我雀羅儼然見客王猷之興馮謹之義豈足高乎以此知門下嗜士非如葉公龍也山中抱書頗無它羨惟是

營置錐之地以安妻孥拮据狼狽稍作苦耳今冬爲幼子畢婚後欲赴元美氏弇山之期因過雪川一哭子與比過石頭或在春仲俟公一道故於燕磯牛首之間可得許乎公之久於南也士人相問以爲異生無以應第謂之曰大臣如周召分陝何異焉公且須吏入相矣偶呂舉人赴太學便草率附候諸不罄陳復貞吉宗侯書

不見君侯十年矣夢中命駕莫知何從惟是案置高篇壁懸佳畫神氣數徃分遠益親頃仲美持君侯影子來不異儼然見過幾欲抱臂捋鬚與之敵談鋒也

詹禹川夢 卷之五十一
回視十年之前又安知非真夢乎損惠家珍屬意良厚焚香酌酒足忘其貧讀元美好辭已不能復贅重違尊命強綴數言恐不足爲君侯益也所示近作僭有批評併乞覽裁不盡不盡

報元美書

頃附馬舍人一書述所以不果去意詳矣度足下亦能諒其非誕中夏以來半住山間爲冢婦視葬事甫畢又爲犬子議婚僕老且貧何當此鞅掌也敬美爲潘中丞所知不得遂其初志比來精意吏事不復弄翰墨昨一遣人過視知其家已至近況益適助甫密

邇江關久不聞問卽僕東下時亦不能以野服相累至如公家小祗園諸景蓋時時入夢不止神遊矣

與莊則勸書

得兄急難中手書知方寸甚亂而去使還報亦知事不可爲矣爲兄慘怛者數日日來僕且病不能卽往一弔心尤缺然老伯母享有高壽雖鼎養未逮而兄亦未嘗有不竭之力稍用節哀以保其遺體亦子道也如何謹遣人先申一奠併問歸窆之期遲旬日尚當親酌之

報李本寧大參書

謂不佞於執事踈耶而竊在世講同臭且同病也謂不佞於執事親耶而大故不相弔屢歲不相聞去路人幾希矣則處親踈之間乎何以修先公之明德而風兩家後卽不佞以薄爲道無以自解又安敢望執事脫然於親踈之迹而置之愈遠愈近愈曠愈不能忘乎仲美故從公家來而不佞則不知其去且不知去之公家也當公越在草土時曾不以一字爲慰此雖路人未有能恣然者而何以自解也曩聞王中丞薦德興徐生爲先公相地蓋耳其名目其書而不知非其人也或不敢誤公家耳一試於不佞再試於耿中丞敗矣公家或未嘗專任之則先公之靈也不則竊有疑焉仲美再往揮汗附起居幸裁察

復汪惟一書

鄉歲辱枉過屬新徙傭作未休而郡大夫有遠行客屨盈戶又苦貧無市租可以爲供具致踈薄于從者非一端也惶恐蓋至今矣子與傳向候誌銘爲案而元美亦曰俟其家以狀來邇且如此況遠在千餘里者乎執事以此責僕負盟過矣姑俟親詣長興哭其墓而後傳未晚也前此未能遽行則以新居近市頗爲褻穢所委頓又不量力小治園居避之今始就緒

明春不西走玄岳則東走吳會執事其掃竹里片石
俟我乎

復郭趙州書

曩見吾丈與二三鄉大夫招隱會社了不關世情何
陶然樂也比欲竊效而不可得未幾得之業已託宿
郊園寄興霞表以希不辱吾丈然又恨不得從吾丈
修舊歡爲快奈何兩郎君久擅千里名尚未遽展逸
足咄咄異事比見高文殊有奮轡驤首之色不萬里
不息駕矣廼辱命使輕數百里索我山中屬之執筆
顧郎君英妙且經諸名公物色品題孤陋如弟何能
贊一辭也重違雅意勉寓數言聊志通家無所論工
拙惟吾丈裁教之

復郭氏兄弟書

僕朽棄丘壑矣不謂兩賢修通家之好使使山中儼
然寵靈之且不知其少文也折節問言益不勝愧汗
古兄弟以才見名若洛下雙璧平輿二龍類多好事
者侈之至如兩賢腹笥羣籍心匠諸家承餘唾者解
頤手殘編者擲筆三楚異產指不多屈久矣僕之孤
陋何敢謬爲人倫不知量哉惟是高義虛懷浣人心
腑且令人自忘其愚勉贊一辭披之復覺形穢豈兩

賢不為僕藏拙乎使還敬布區區

甌甌洞藁卷之五十三

武昌吳國倫著

齊安王同軌校
新安方尚贊校

書三十九首

與張羽王書

明公以碑視不佞知不佞之劣於碑也今得以為型
範矣因憶明公論碑當學蔡沈迺桓侯祠記又小似
衛覬而間入崔寔列傳語即不佞嘗謂今碑用列傳
而明公不以為然何耶今觀衛覬三碑雅出蔡沈上
竝為蕭統所遺古今人論文何常之有迺明公信而
好古則不佞心下之矣祭相國文超潘陸而望孟堅

爲助不小夜來恐未遽得自構一章及覩來稿不覺
汗愧自失容面謝

與王行甫書

兒去適有寒疾方汗不能作一字爲問方山人想能
道之已聞足下遇兒過厚私心竊不能安使者同郡
更來爲鄒使君索序時賤體尚未平兼爲功親舉一
喪遂又濡滯數日今雖如命脫草愧不成章恐無當
於使君爲足下玷奈何小園花石如故偶得吳中善
爲山者二人來撤我壺嶺甌洞而稍廣之又鑿一
渠環山而出通滄浪水內外竝可泛槎工須數月可
竟卽楚人而吳園非不娛悅奈非貧家任何鄉聞盛
從有能繕茅亭者九日前後或遣一來可乎若主人
攜之俱來更踰所望生亦當與俱赤壁也

奉樊山王書

偶爾涉江載塵寘序遂辱觴之名園視以宏藻幸厚
矣一醉以往渺焉川陵欲附南皮之遊而續西園之
詠可更易乎歸未數日徐可源攜翰札來細玩諸篇
益近風雅王公之好學不倦甘士如飴者求之古人
亦不多見至欲品題新社之作而綴言其端則非僕
能也敬謝敬謝可源行造次布復

與羽王書

移楚集兩經細閱而靛筆爲加詳過江集雖止一閱則兆孺爲之地矣兆孺於風人之旨不甚深猶幸不輕去取迺楨伯少足下遷蜀詩則大不省所謂大率遷蜀詩微涉過激而湛鬱悽惋處獨多正諸名公所不逮也楨伯得無以皮相乎移楚諸作境稍夷意亦稍適官雖不調有故人在焉故多用平調而冲雅勻密無甚峭厲語然欲奇絕如過江萍浮二集不免小遜耳僕嘗刪諸子詩每過刻而獨用恕於足下盖足下自得於詩者三學然後詩一也每篇自匠一意不

相雷同二也用句用字多古詩之流而不事纖豔三也顧足下猶自求多於宏壯瑰麗以僕觀之業已在其中矣若夫持徑尺之璧而索微瑕則亦有三好古大過或傷才憤世大過或傷氣感遇大過或傷調卽僕有所不能盡汰而足下燭照之矣辱在心知敢亦以此自效愧是井中之見不足通方惟裁教幸甚

上陳中丞書

偶聞新法更張運軍郡邑洶洶關係隱瘼不敢不以聞蓋運軍往反京路終歲不休視之戍守勞逸十倍且有意外漂流兼之運官剝削僅存皮骨輒稱天幸

暨其米入太倉後歸途無資不議一二先歸勢必俱斃其有脫逸數多則又運官小弊罪不在軍今往者未回尚未卜其爲人爲鬼而復槩以戍守之例勾攝戶丁夫婦責辦軍裝令之僦居省城以待後運夫一軍之運費已不訾今方望加優卹而又密其法以重困之則衛官必增見而軍婦必增月糧僦居必增賃值似所謂水益深火益熱其勢大家不破小家不逃不已也卽一州兩邑之洶洶其在通省人心可知有司奉行無不蹙額慮變但避阻撓之罪不敢直言生方伏在草莽謬辱心知且憫桑梓之民無所告急故敢冒昧密啓乞賜詳加咨訪速爲調停以蘇一方大厄陰德無量至懇

復灌甫宗正書

年來索居郊園心境漸寂惟有誦讀歌詠以送餘齡耳惟是海內二三故人不志寤寐而故人中生平所欽服如君侯者經術藝文種種發自神悟無復一語粉飭雷同每一抽玩宛然侍坐東坡受益無量昨歲冬杪爲先君改藏方礮一石重鐫墓表乃工未及卽而從者在門碑從天降君侯之寵靈不肖先君之徼福君侯殆非偶爾不然不先不後若是哉無論遠

塗厚費而使者維繫護持咸出君侯心力數千里外
所經川陸舟車屢易曾無分毫磷玷喜何可言感何
可言乃又損惠家珍食以梁園諸異品尤出望外業
已薦之先祠用告明德屬新春應酬如蝟且不敢久
羈使者薄言申謝諸容專遣以候不宣

復黃梅劉司訓書

執事負奇未售乃以其緒餘爲名邑師而一時執經
抱藝諸賢皆北向嚴事之卽緣分脩職隨材曲成未
必非萬里結轍地也邇所聞賢聲蓋津津人口吻矣
竊爲心賀山中癯朽業已偶木石而狎禽魚自分無
補於世乃執事意氣在遠益親時時惠清問鄙薄何
以承之兩銅鳧若翼而至前不異子喬雙鳥從天下
也日抱書焚香拜明賜厚矣使旋率爾占謝諸幸亮
察

奉陳孔震中丞書

獻歲且七十日聞旌節尚駐武陵牂牁間未暇還鎮
帳下士勞矣國倫無所從起居不任私念惟是元老
壯猷一舉苗格露布所至歡聲如雷此盟府之特書
而楚人之天幸也敬賀敬賀春雨病麥菜色盈野延
佇絳騶以日爲年此時帳下士得無釋戎衣而東乎

詹垂汗豪 卷之五十一 五
國倫久病目近日始能為林貞女作傳愧非名筆亦
不敢不竭其情蓋貞女鍾天地間氣而發兩名家世
德史冊希覲古今罕儔捉筆命辭益令人起敬向嘗
作石瓊秀傳已奇其事此尤褻然出瓊秀上矣道遠
莫致敢以託之郵筒

報鄒彥吉使君書

歸臥田間得時雨數日政與農人鼓腹相歡而王使
適至又得明公兩贈言調高意遠遂足為鶴鷄集冠
不佞本非大敵奈明公有餘勇何第獎借大過不覺
赧然自失鄉謂竊附知己私願至足何敢當明公旗

鼓哉黃州諸勝有待而顯有如東陽永嘉非沈謝不
名若赤壁本奇假借嘉魚無當雪堂竹樓雜解字間
高士幽人曾不得一託足皆所謂前人不足古也至
求黃歇殘壘永安故城卽居人不知所在獨稚卿先
生詩稍備一邦逸典而其辭又宏麗大家高視蘇學
士二賦何論季常今先生骨已朽明公豈有意一表
章之以風楚後學乎先生從子行甫氏得在門墻風
氣日上近著兩遊記與西山飛雲諸詩庶幾魏唐人
語想當見賞如何如何

與方子及書

詹垂江夢 卷之五十三 六
向里人持足下數行來且知近況殊雅乃猗蘭稿反
於他處得之而足下不以見寄何也司徒郎署儼然
得二方爲重亦一千古事韜光避忌是在明哲鄙人
舍此無所效其愚卽往時七子云云善宦者遂以爲
殷鑒矣如何如何

報王行甫書

頃過辟疆園暨遊三山順流而歸自謂去神仙不遠
乃一入里門便嬰塵俗與襍穢子應酬遂不能吐一
辭以紀名勝無何時雨解慍方與田父踏歌爲歡則
足下兩記鄒使君兩詩儼然在案何物鄙人蒙幸乃
爾使君詩高雅視鷓鴣集又進一格將謂遇大敵則
勇而鄙人又不敢當然不可謂不知已矣足下記文
雅有沈思而抒意狀景絕類魏晉人而結煞過之諸
詩則翩翩元貞一洗其舊勇於孟賁遠哉恃在虛懷
商兌一二字幸速更定就劖劖也園丁移竹業已成
小林旋烹石首魚酌宜城酒賞之不減在柯山籬下
行甫愛我哉薄有宋研一方宋帖一本聊致區區非
敢以答贖也

與宗良王孫書

三月曾束一書併摩尼庵詩屬顧氏子以上想當不

至浮沈佳篇一冊久在案頭日取而誦之不減與足
下追隨述作足下蓋勇於詩矣五言古九日以前五
章酷學鮑謝所不似者幾希詠菊以下浸淫魏漢間
中微有純雜而亦多拾于鱗語至如識曲聽其偽則
于鱗摹擬敗句而足下化而用之反佳七言古如戚
將軍花卉歌大自宏麗是少陵家法當謂全勝而白
紵舞歌又似于鱗影子然細玩于鱗則足下不免少
遜矣五七言律絕句深穩處多類明卿然縱筆之失
徃徃有之間用僻小曠浪語則不善學敬美而誤也
豈足下不以爲定論乎近見敬美關洛紀遊諸詩格
漸高境漸化倍勝舊作此郎畢竟善悟不可量也足
下得之否

與趙司理書

園居寡營獨晚年益嗜酒爲可咲風雪在戶木石情
親卽一日不飲僵臥耳它復何奇

答張黎平書

初聞明公有黎平之薦僕竊以爲楚喬壤非所以居
公已又聞報可則大自悟知爲其地新解兵非公不
足與填撫也夫以明公之才兩臺使視以爲一方輕
重力能得請於朝卽朝士大夫皆得視以爲一世輕

重茲行榮矣哉卽通都大藩不得與裔壤爭重矣且
黎故黔中郡而楚以兩衛翼之諸蠻夷長官駢臂聽
命蓋巖城也承平滋久事權稍分忠敬可行於蠻夷
而號令不申於士卒一卒大呼風走雷應僕於十年
之前蓋已虞其有不測矣比在田間不關世事邇聞
辰沅之間有戒心者數月非卒之譁而病民則夷之
有所激而負固也然負固易解而譁之病在腹心非
扁鵲不治昔人以叔瞻宮之奇爲虞鄭之扁鵲僕竊
敢以望公公豈有意乎黎自今不足平矣

答曹伯舉書

往見方孫兩山人稱伯舉以詞才困主吏非其好也
不佞反之曰安見郡國辟主吏用不必得才抑不必
才如伯舉也古之賢者類多潔其道而穢其迹有如
賣漿屠羊阿里街卒武功亭父皆下主吏數等而卒
用貧賤以顯名受知來世由斯而談謂伯舉爲主吏
重則可主吏何負於伯舉哉適覩諸篇居然藻雅不
負兩山人游揚而語次多感慨磊落之氣則所謂詩
言志也又不獨爲主吏重矣沈周墨跡笥中亦有舊
藏然未有精如盤谷圖者且親題其後購之尤難伯
舉以此見貽可謂割家珍矣敢不拜賜風雷卷詩與

序竝不甚工豈仲美操醉筆而諸君亦率爾應之耶
乃元獻之跋佳集大有古意聞其人亦欲過訪幾時
可與伯舉方舟來耶

報楊仁甫書

西郊之攜愴焉河梁景也車塵漸北心旌竝馳數奉
手書忽忽如就見已又忽忽有長別之感雖明公以
待次爲安而居人常恐不得復借寇鄙念又百倍於
茲矣計後消息尚爾杳然頃聞東筦袁君業已視學
西粵此明公之前茅也今且有推轂明公者矣舟人
徃迎想當代竹馬如故事明公豈誠效河東守復至
耶至則爲居人賀而明公不免滯留不至則爲明公
賀而居人不免缺望要之無一不鞅鞅於私心也春
來僅與羽王一二醉羽王尋有蒲圻之役徃矣舟人
峭帆迅發率爾報書

寄張羽王書

江口夜酌別意愴然鷓首纔分大風驟至此爲殘暑
所迫不復能視解纜其明日歸至北園則覆觴不能
舉掩卷不能讀知音旣遠山水皆長物耳能無傷心
非人哉又數日則吳下二石工來爲我撤小山而新
之遂䟽一渠遶山通滄浪水垂成僅與仁甫一飲卽

醉中未嘗不念羽王爲之歔歔哽咽嗣得江行消息
最後得岳陽書併北園老翁詩讀之益知公奇節遠
懷可千古而不可一世象鼻山尋當與青城玄圃齊
名矣度此時息駕高坐無復風塵色卽有所苦貧也
非病也世人將奈羽王何許序拙藁千萬留意

復周思友少叅書

海上負韃爲騶從前導彼其時蓋劬勦戎馬間戒心
動色無間一致款密語今靜思之安危得失俱幻夢
耳何至令人失其故常乃爾耶罷歸數年與世睽絕
然得抱書洗藥以自適其真性而舊痾盡解則流言
之賜大矣每念故人近在三百里內不能操几杖以
從之遊視一江爲異域悵然悵然

再報陳中丞書

比歲不登列郡氓黎且溝壑矣自明公下令發倉所
全活無慮萬衆乃今雨暘時若百穀旣升殆十餘年
所厯覩仁人德意天亦應之如是哉國倫伏在田間
日與農人相慶弔惟明公獎其重農者而又察其病
農者而進退之是用天道也而天之應明公蓋不啻
以三楚列郡矣

報元美書

自揚州牧遷去書郵遂不易得間致一二遊客數字
幸出強應非足以通其心弟邇時居室苟完又以其
隙小治園花石具體庶幾吳中入所謂盆景聊以逸
其餘日非敢望弇州山也足下修持既堅屏廢一切
穠郁之好聞之竊爲心快乃賢仲又擬弃一官而還
與足下相朝夕老焉想當增快數倍弟恨不聞道而
亦恥不與黨人至欲往謁老師之墓造足下之庭則
夢寐不忘老死不倍幸足下待之春來病目苦以筆
研爲人役然誦詩讀書雖衰憊不能一日曠也小集
粗有次第俟面質而後錄行獨念子與諸稿經弟更
定者甚多而青蘿館前集大小續集纂自汪生手傳
者未必盡佳佳者多在所遺今更定舊本在汪郭二
生所匿不復出嗟乎子與生厄於悍妻死又爲兩生
所厄可爲大痛有如下鱗詩刪託之匪人徒爲識者
姍笑足下其亟爲一正之

復張司務書

十三年前辱兄顧我京邸而申以抱璞之讖示以尸
居之儀弟雖不能了然于茲然知有道之言與動必
有旨矣闕焉滋久想益有淵詣乃今來教亦復云然
殊不省所謂夫信今傳後非止詞家事卽有道者未

必人人當之弟何敢冒焉居也至謂不失時卽能匡
時有以貽後卽可傳於後則其理一也兄猶岐爲兩
致豈理可二乎面承無由聊此相答

與何仁仲公子書

向附王司理數行想當徹覽久冀執事有訪戴之興
奈嘉樹園不及弇山何端居寡營感時思友傷白雪
之鮮和睹晨星之易稀卽魚鳥娛人卉石佐酒然可
以託迹而不足以怡神此伯牙絕弦郢人捐斤所以
爲千古長嘅執事蓋有志焉而能忘情於斯乎

報袁履善書

比入大梁卽聞足下有宛之難久之始得爲華亭人
業已稱幸然意悲不自勝矣暨不佞被放得爲下雉
人閒中思故屈指如晨星念欲東遊取次晤言卒卒
爲家累至不能裹糧興屢發而輒止者數歲然從諸
遊客聞足下起居無恙慰心不淺矣頃得廖生俞生
先後致手書且奉假山諸作使容膝之地得藉寵靈
爲名圃何厚幸哉俞生還先此道謝併以二詩書惡
扇寄意其一在大梁時作也幸賜裁教

答李別駕書

鄙人去高州十二年憶與諸子周旋雍容至蠻兵壓

境而不亂島寇犁城而不危庶幾陳蔡之從也豈一
夢寐忘哉今鄙人削籍仕途且老竟不得與諸子一
再遇三年前姚吉士自京師緘一書來喜如復見今
又得執事書且聞海州佳譽其爲喜又倍之矣何至
分俸相恤腆厚甚耶惟是執事負美才承家學雖爲
制科所遺業已儼然佐大郡且當 朝廷用士破拘
攣時舉察賢能定當畀右職卽制科何加焉幸益強
飯自愛需之耳所示生祠碑鄙人深愧不德無以當
士風之厚且聞姚已下世悲感何可言

報王僉憲書

往歲使者行郡鄙人一望前茅心目如浣顧從者傳
檄飛渡息不停晷至欲脩一芹之獻而不可得此豈
獨鄙人有私歎卽父老子弟具謂不能須臾留君侯
一振州里之玩愒而使瘠者遽起墊者立安也春來
淫雨病麥菜色盈野想不待察眉而知之鄙人竊爲
桑梓過計春潦夏必旱兩災相仍盜起且如蝟曲突
徙薪必有長畫豈有陳於君侯之前者乎容當造膝
以請願君侯之留意也

報李孟誠憲副書

往在海上以軍旅之事受質明公明公未見而才之

既見而信任之已又舉三城之完以功國倫而獨引
電白之不守以自咎此豈惟國倫所不敢承卽史冊
所稱探聖賢之微弘將相之業者未必可望明公萬
分一也蓋明公心誠任天下事故心誠愛天下才雖
不肖如國倫亦在所收有如儋之神師賤卒嬰之上
客芻虜人未易測也國倫蓋亦心結之入以語兄弟
妻子出以告公卿大夫莫不慨然以爲古道復見方
圖所以報明公而爲明公用廼明公業已拂衣去而
國倫亦坐飛語免官矣山中一無所營但不敢廢學
然恨不能翼而日侍明公前也

答費文學書

當代相門累世家學文武衣冠之盛未有尚於君家
者僕自薄遊所遇如太平守太僕丞司空郎及平虜
將軍皆未嘗以僕爲不肖而託交焉最後則臨武順
德兩公傾蓋如故退而自幸一別苦不相聞豈知猶
有賢俊如執事卽以臨武爲是父順德爲難兄乎且
生平無面談之偶一旦有千里之問遇我殊異感君
何言顧詩文薄技畫脂鏤冰不足以承高雅惟是同
聲相應藉爲忘年之交重耳佳篇盈牘語語唐音僕
不能復有所贊聊草一詩答貺幸裁教之

答袁黃巖書

都下一握卽附心知且以雅道相命固恨相見晚耳
黃巖仙吏天將以名山奉之人地相傑大自奇事別
後尚謂聞教有期迺僕徼福流言削迹世路自分空
谷老矣故人高義在遠益敦題書分俸儼然自數千
里外來意何殷也短牘佳篇居然大雅而猶折節下
問豈不謂空谷之人可與言乎顧郢曲沅騷寂寞已
久僕欲以中庸之才一振之恐非其任奈何鴈蕩之
遊積念已十餘載向爲軒冕所束今復爲婚嫁見羈
過此卽有登臨之緣不遇仙吏亦當取嗤山靈可勝
悵憶

報李本寧書

早春西遊徃反貴邑之境上廼獨不得一抱足下臂
而有謁豈誠愛百餘里之勞甘爲行路人耶心之精
微蓋難言矣歸而自悔卽不爲行路人是亦鄉人已
耳足下能盡恕乎初夏聞有鄖水之警良爲行隄者
病知足下卜居邑城想當無恙偶葉山人過敬附數
行

奉復許相公書

比聞閣下入政府天下士氣人心歛然欣鬯蓋休養

和平之福可延頸待也幸甚快甚鄉茂承以三稿上
掌故自媿蕪拙者數年乃閣下拜相初辰又遇
天子臨軒策士冠蓋雲集機務方殷而猶遠念蓬蒿
儼然辱之書而過獎借之茲姬聖吐握之風千古再
見非衰朽所宜蒙也奉以藏諸家廟令子孫世諷誦
焉與璽書竝珍矣茂承再北謹再拜附報音僕竊不
自量欲以平生諸稿介茂承乞序於掌故夫桂檣繡
鑿見者稱艷而不必其中之盡美也過望如是閣下
豈有意寵靈之乎得擲數言榮於推轂數倍臨書不
任祈懇

與王子振書

間者浪遊名山一遇執事不啻與名山竝奇矣執事
夙悟博通負不世才比見德器宏厚絕泯茲妙迹心
竊賞之夫才難而善將其才尤難執事蓋進於是異
時樹聲藝林書伐盟府何以難執事哉竊附忘年之
交坐進此道執事得無以爲耄也

復南海蘇生書

山洞高眠於世一無所羨獨恨故人離索知音寥寥
耳偶廣濟人致書莫知所自乃南海公實惟敬之後
復有瑰琦如蘇郎者何心賞神交萬里一室如此耶

細玩百篇泠然多古意計它日所就必出公實惟敬上也聞有剡溪之興不惜顧我巖間倘如所期此爲盟質

與孫兆孺書

田郎詩業已如命序之大意爲公不爲田也田詩中類多僭稱人字如皇甫吏部輩皆先達士而元美中丞又其父兄所嘗受號者徑字而銜之於心亦大不安推之恐亦足以賈禍人且謂田郎狂如伯良伯舉皆自公從史也卽唐人及李何諸名家亦有稱公與先生者今詩不及唐人與李何諸家而徒以稱謂過之何益幸明語田郎亟改爲望

答趙黃岡書

頃過黃辱公厚視不勝私感乃兩邑頌聲夾江盈耳鄂人以失公爲憂黃人以得公爲幸此可以覘公之大矣歸伏丘樊遂已喻秋序馳仰高義爲勞如何所不敢有咫尺之訊則丘樊之分以干人爲嫌也兩吏來叨承華牘字字通心知公不以衆人遇國倫也至以使君贈言見委大非所任卽使君先數日書至行期便在月初事迫矣語云疾行無善步況不佞又學步者耶重違尊命勉就一草負愧冒陳以俟繩削使

君好古文中率以古意望之故不敢作浮譽語諸公
得無以爲面謾乎謾則不佞之罪也

報侯欽之兵憲書

山澤遺黎瞻望旌節歲不再至已弗勝其嗷嗷一察
眉可見也何論國倫屬在提命之末者乎江永可航
室邇奚阻緣自野性一縱結束維艱遂不敢以竹冠
荷衣走辱幸舍然自絕亦甚矣邇時抱病暑中都無
所營但耳民間謠語竊謂明公秉法故平樹德尤厚
造我邾鄂席之金湯轍迹所經膏雨更渥然猶有私
望焉若曰奚爲後我也明公豈無意乎

復曾司空書

故人縣車曾未數日而弟卽以浪遊之跡遭之會如
夢中立談酣語又儼然在天上卽欵洽三晝夜勝平
原十日已多迺行時復辱割所珍見餉綈袍踦屨情
豈有已乎東行未旬日抵家頗爲高陽舊徒所困鉛
槧都廢所委名園詩至今未就慙負何可言

與元美敬美書

憶僕嘉靖癸丑過吳郡時因敬美得交彭孔嘉已卽
託書先大夫誌銘又偕之遊虎丘分韻賦詩而別後
聞孔嘉物故其子孫漸微計不能一脩舊義偶今年

漢陽劉生攜一兒男過我訊之則吳人也已私訊之則孔嘉孫彭惟謙也云其父死後其兄惟訥以淫蕩破產稍分餘資脫身遊外家周訥氏已周訥盡費其資逐之歸歸依庶母庶母私其所生不能衣食之遂爲其兄誘賣與劉生劉生每束縛而奴辱之惟謙不能任僕聞而歎曰汝兄不仁哉因以原直贖其身幸劉生不敢恠擬明春自攜以付足下會從者東下便遂託之先攜以往幸足下哀憐而衣食之知足下昆仲與孔嘉交更深處情當更厚此兒必不至失所也

懇懇

與方子及書

自子及橫離匪人遠作南荒客僕鞅鞅不能平者數年比來官猶故矣齒得無少長乎幸且安積薪未有才美如子及而不大爲世用者新詩盈案久不得一誦竊復有私望焉

復黃孔昭山人書

暑中方困燠熾而執事偶過穆如清風至奉雅談移時則又泠泠白雪調也病息漸蘇從者遽去無可致鄙意迺猶有秋期之望竟復杳然謂何潯陽書到不次抵掌第獎借泰侈至以合古爲定論良非所敢當

以當高義若此感激感激爲憶二十餘年擬拜先師之墓垂老未遂死不能作負心人幸且形神粗健從往反玄岳試之尚能陸傲冰雪水狎風濤獻歲元夕後可卽鼓棹而東仲春初旬定作弇山堂宿客伯玉肖甫何緣輻輳然弇山堂自不可少明卿一脫屣耳二絕句字字實境續五子詩其一雅有建安之風誦之不能去手謹錄舊作諸子詩奉塵記室或足下有見有未見也園署諸作不能遽錄第以北園三山二記應命大率平生所著業已編次成帙非久可盡攜以質於足下而後傳也

報王敬美書

鄙人自還山以來舊病盡解偶今歲暮忽遭寒疾掩關伏枕業已旬餘不圖兩故人書來有如授我大丹立致起色二詩以賤日爲念骨肉至情溢於楮墨而重之文綺珍玩復何可當感謝感謝省會來旨悲四子之凋謝幸鄙人之逮年至以斯文碩果屬之詞雖過實義極相關朝露晨星可爲流涕向子謂已知富不如貧貴不如賤但不知死生何如夫死生猶是也豈向子未盡達乎且如足下往歲誤聞予不諱安知今歲猶賀予生乎餘喘幸存尚當爲足下張設旗鼓

清塵除道以待扶轡長驅足下迺謂年貴於天下而
又不知得年如鄙人否夫鄙人豈足稱年哉足下高
才厚福天寔祚之無過慮也元兄學道已久病安從
生至云餌七藥數月尤非所解豈其道可以卻老而
不可以卻疾乎鄙人未嘗聞道故敢率爾問焉

復吳子彬左司馬書

幽谷病夫聞足音且喜況天上故人重緘累貺越數
千里被之乎叔世交情指不再屈銘之肝膈與此生
俱矣往歲聞榮命私極快心蓋清明之朝正人柄用
天下竝蒙其福卽幽谷皆陽春也何論雲泥哉年來
野性日適貧賤都忘於世一無所羨乃者武當之屐
初停虎丘之柅已繫倘不卽填溝壑更當取次周五
岳以送餘年故人好我將無錄之方外交乎巖詠二
律鏗然雅音謝教謝教張羽王粲西才子曩爲吏道
結束今得放之灘山遂其初志而所爲古文詞益自
精宏乃知音良未偶也一辱明公折節遂爲士林增
價此不獨羽王感矣握手無期西望於邑

復張羽王書

頃方編次拙集將攜之吳中就剗剗引領佳序不啻
大旱之望雲霓屬且戒舟忽從司馬公緘中得之蓋

自天而下也披玩數過宏麗沈鬱大為鄙人增價此
何以報之書成當先馳致足下耳讀灑山吟有如置
我清室而巖泉溪霧泱泱目前可知北園景光亦在
足下記憶中也司馬公故好文而交義更篤業已為
足下寓謝使去倉卒不盡言

報蕭太史書

往來過二別不及一望門墻歸而自恨迺得劉生致
報書何獎與殷勤過也國倫自束髮綴學遊藝林至
老無一字可當述作回視楚先哲鬻子以下如倚相
丘明屈原宋玉輩不啻天淵其為楚辱甚矣明公一
登鼎甲便主盟斯文壯哉志乎無論諸賢詞賦祖也
卽鬻子為文王師而其指具在往籍蓋呂尚父之儔
非明公其誰一振其業乎劉生行因得草二詩扇頭
為贈

復王行甫書

仲美以除夕還下雉相見亟稱公子之英敏而文氣
雪然驚人為足下喜不能任僕東行業已裹糧載圖
書于舟矣政候足下與鄒使君消息便可解纜使至
迺謂必旬日而後可發恐不能待卽治行匆匆日醉
餞者家不能作一語贈使君姑留冊俟舟中圖之足

下須先期下富口與僕俱東候使君于二孤間至望
至望

復吳國賢書

里有名賢如足下相去且步武而又時時以書通心
顧一晤之緣尚嗇無自面承大雅甚矣國倫之離索
哉劉使遠來辱以中丞公遺藁見命此國倫責也敢
不拜命尊公逸行已於諸公撰述槩見而心折之矣
久負初盟不任惶赧即日便當終此役而劉使苦不
能待計旬日後可付何生專致之幸諒弇山之會政
如所云元美別予長歌末句云縱令醉死亦不辭人
間此人寧再見情見乎辭矣冗次草草申復諸不宣

報勞君任中丞書

不佞向遊武夷見故志蕪穢爲甚屬其時有兵事且
賤有司避選事之名遂置不問今觀新志出明公手
編文簡事核犁然一家言蓋山靈有待而顯遂與五
岳俱重非偶然也舊遊四章偶在行笥錄呈覽教幸
一咲而擲之

報敬美書

廿三日謁子與墓不任悲愴遂病楊安人見弟所使
小僮泫然痛哭備言感足下兄弟深恩不然且有不

其後不有其家卽不有其命也屬其親戚故人以弟
至爲異事羣然以酒食相勞頗爲所困越宿卽放舟
逃矣元兄使者還附此道意

報元美書

艤棹閨門又八日候從者不至頗爲諸酒人所苦夜
來得佳序讀之大自欣然忘其爲羈旅矣序中獎借
殊過至以不佞當屈宋而謂三人可蔽全楚尤非所
能乃又指騷賦爲弟缺事則何望之厚也弟亦嘗有
數作居恒謂左太冲後無賦可傳而今人強備此體
雖李何塵塵楊馬之糟粕故復羞澁不敢以示人而
足下顧厚望之俟再思以復

報李于田書

舟中細閱佳篇種種精詣微有評騭不過強效其愚
耳別公未十年猛進若此作者之庭豈其遠乎適抵
秋浦遇門人趙司理敬託轉致併謝高情司理亦留
意騷雅者幸不吝切磋

與陳道人書

細閱佳錄雅見冥悟惜鄙人未嘗學道不能遽贊一
辭非止畏暑也語云善易者不言爻象況不善易者
乎必欲有言尚期數年再過蓋數年以後執事進而

化鄙人思而通庶幾言相成也如何如何

報黃鳴臯憲副書

臥龍復起霖雨可需茲士林所共欽而世道賴以鼎重也況執珪仕楚而楚人得之乎第襄鄂阻千里外無緣縮地一接故歡則有引領悵悵耳又計法從初停使臣輓至境上之役數月未寧此皆下執事意外之勞而所為驚心扼腕之狀又可想矣回視鄙人去歲遊玄岳時景象得無稍異乎病起有懷屬方生西行便敢布區區

與周少府書

黔中故人執在三之義如吾子者厚矣况脂膏不及自潤而欲分甘老友此一念不可當矣猶忍有過望乎仕楚三年孤蹤如寄茲幸一擢佐大邑其才稍得自見駸駸嚮用有階竊為心喜但從長吏後而又附在會城觀望趨承益須加慎高明以為何如

四六二十三首

賀冊立

中宮表

伏以

帝德光天萬寓戴神靈之統

母儀配地六宮啓風化之源典禮議自宸衷懽忻
騰于薄海恭惟

皇帝陛下德兼明聖運撫平成當正位凝命之初采
理陰從陽之義謂大人之學教國必先教家自邃古
以來治內斯能治外恩隆齊體燹章肇舉於星軒
禮重匹麻徽號昭宣於雲漢螭蟠玉璽聯九御以肅
宮闈鳳翼金根奠二儀以承

郊廟正始之風既播刑于之化斯臻臣某等案服
外藩心懸北極覩絲綸而胥慶馳舞蹈以無從伏願
日月同輝清寧竝運仁孚麟趾家祚與國祚齊昌

瑞集虹樞

帝心與人心協應

賀冊立

中宮箋

伏以

天生聖德御六合以體元

國有母儀參三才而正位化行宮壺懽洽寰區恭惟

皇后殿下靜一凝休仁恭協

帝屏符雙雀夙諧寤寐之求輦從六龍竝應神

人之主光生蘭殿祥雲護玉璽以當天禮正枌房

淑德贊金閨而配地陰儀肇建已瞻渭涘之興周內
訓章明真卜塗山之翼夏伏願居循阿保動中珮環
修分綵獻繭之儀固邦基於有永啓繞電流虹之瑞
綿歷數於無疆

謝

賜彩段白金表

代作

伏念臣頃以庸流叨分藩牧司存會計政愧旬宣偶
緣反側之夷擾我邊鄙爰整膺懲之旅奠此西疆雖
戎器夙除矢石未嘗親冒而糗糧粗備轉輸豈足言
勞將吏協心自

天威之一振兇殘授首出廟筭之萬全欣逢三捷奏
聞遠邁七旬來格詎意蕩平之後旋頒優渥之恩臣
愚無補於分毫

帝賚不遺其尺寸禹金三品光分內帑之珍虞服五
章彩炫尚方之襲榮同賜璧溫踰解衣臣敢不益礪
素衷仰酬鈞造伏願乾坤寧謐中外乂安九牧貢金
永固平成之業萬邦執帛茂延富庶之庥

送胡方伯赴陝西啓

天王眷西土周咨歷試之賢岳牧翊中朝特重旬宣
之命司存藩屏奠華嶽以固金城力寄股肱挽河源
而清玉塞布省方之駿惠勛非衡石可程操經國之

鴻猷慮豈智囊攸測惟茲弼由

帝賚適符名世之期乃爾簡自宸衷益肅在公之義
五熊開道鏡中攬秦地山川雙隼拂雲袵上置漢家
民物甘雨以時爲澤德星所至增輝恭惟大方伯鳴
和胡先生汾陽異產安定名家丰神煥彩於九苞文
藻探奇於五緯斲輪悟道澄心沫泗之源迎刃應時
奮跡唐虞之際南宮賜第東觀蜚聲珥白筆於殿中
蚤奪三狐之魄鞭青驄於海上更存一鸞之風尋以
敷歷懋勳累遷觀察總憲按萋菲之墨吏威名震布
於兩河洗桎梏之冤民生氣昭蘇於列郡寬嚴竝濟
殊稱青史社稷臣才量兼弘不負蒼生公輔望頌聲
滋赫譽命載新握分陝之符儀章異等擁入關之傳
徒御騰歡謝棘省以西馳轍臥梁園父老登薇垣而
北顧天懸魏闕星辰體國足民羌壘一夫無菜色承
流宣化義輪萬里見葵心平生海內儒宗此去關西
夫子伏願經綸益究寵遇薦膺
皇靈鬯而功載鼎彝人瑞昭而榮生劒履爰采謳歌
之意式敝餞送之詞

上御史大夫王公啓

恭惟明公閣下 兩朝耆德六服具瞻作

帝股肱司天喉舌霜清握紀曜炳敷文臺端輔法之
臣矢心效其正笏海內蘊奇之士延頸願爲執鞭比
遠吏入朝之年正明公開閣之日伏蒙憐其落魄
遇以改容侍坐論文旣慰斗山之仰憐才借譽尤存
吐握之風脫越石於羈芻難稱遇合識公沙於杵臼
豈藉游揚恩踰九遷價增一顧使唾核翻然見品而
死灰尚令復然徼幸於天負媿何地竊自惟念無可
受知操孤尚以依人早離投璧之忌網羣疑而涉世
莫辯償金之心三黜竊比於展禽一言虛召乎季布
枉尺旣非所欲惜分敢以爲勞矯足羊腸未問郵程
遐邇全身虎尾不知機事安危晚廁門墻旋披雲霧
但剖符旣遠削牘難頻登望海之樓以望京目與扶
桑竝峙閉思過之閣以思舊身依叢棘爲鄰且通籍
二十年徒飲前魚之泣投荒八千里又題窮鳥之悲
况鱷焰吞城狼烽蔽野死守可效生還無期敢謂鳴
其不平竊欲伸於知己

謝 鄭王啓

恭惟殿下愀忱翊國恭儉儀家德表九宗文輝四曜
雖河間之樂善未足齊賢豈鄴下之摛辭遂能媲美
乃猶虛懷嗜學不惜降體延賢切磋兼勵於武公艱

阻備嘗於重耳誕膺光復彌劭清脩頌溢兩河安同
四岳國倫偶以巡行之役叨承吐握之風慚授簡之
非才憾曳裾之尚晚何期厚遇不異窮交設醴旣顓
緘書至再中岳之靈孔邇南皮之感滋深河水盈盈
私心戀戀茲邁一陽來復懸知百福是道無自稱觴
徒懷獻襪顧勤命使遠錫珍儀瓶膏味旨於瓊蘇籠
幣文工於火藻啗之枯腸頓澤服之弱體加溫且覽
心法而企慕前脩奉手書而顧瞻名教寵靈踰分循
省何脩對使登嘉不勝銘刻謹附啓謝

上 鄭王啓

昔遊王屋遂望宮墻召宴留歡陳詩應教被茲恩禮
感在腹心方深犬馬之私已謝牛羊之託拂衣以往
曳履無期言念高懷兼欽大雅雖與漁樵混迹尚能
金石同盟臨湘水以寄悰涓涓不竭指嶽雲而獻壽
冉冉無疆倘辱嗣音可勝延佇僕臨啓無任馳戀

上張相國啓

恭惟閣下佐命調元膏均萬寓摠忠負辰績冠 三
朝豈惟衡洞之靈光輝申甫寔應文明之運伯仲伊
周盖自秉軸以來及夫代言所至上新主德下燭官
邪巖穴殆無遺賢要荒已多重譯此旋乾轉坤之學

靜運而不居由今復古之心潛乎而鮮迹有非尋常
所易測閭巷所及謠者國倫久藉末光粗知嚮往嗟
茲交泰之會益切闚觀之私且竊祿二十年餘已落
而復振投身七千里外分遠而心親雖推轂之恩施
於不報而求簪之感矢在不忘且六載無書非敢忽
然自絕一言干進卽恐負其所知今茲旋解戎衣叨
司學政祇當勉竭駑鈍仰報鴻私至於吐握之懷所
欲下問管蠡之見所欲冒陳則未敢遽及也

回羅中丞啓

三奉密劄仰見虛懷縞紵之誼彌敦堂廉之分盡略
思同加膝感切銘心廼下問屢勤似不知其愚昧而
未籌未效非敢負於高明緣司祝代庖恐離越樽之
誚而工師委斲猶虞傷手之艱況明公先機鏡覽遇
事刃迎諸夷盡在目中羣策俱存肘後蓋大方之龍
燭而偏國之牛刀也本道欲輸獻納之忱知鮮謀謨
之助意者面陳可否庶幾言切事情雖附耳之意難
明而屬垣之嫌可杜故退而脩職不敢有所恃而愛
勞進而受成不敢有所私而藏辯識誠迂矣分亦宜
然顧芻蕘之益甚微而吐握之求未已猥蒙峻賁益
用屏營謹啓謝教

賀總戎方公加陞兵部尚書啓

恭惟門下荆楚奇珍 廟堂重器才兼將相望肅華
夷鎖鑰北門屢奏無前之捷金湯右地彌伸不戰之
威旃表交臂以乞降鞬譯載塗而輸款息烽煙於沙
漠疇窺元老壯猷錯畿輔于泰山益廣 聖朝文德
露布馳而歡生宸陛綸音播而功被旂常匪茲三錫
之榮曷表萬全之畫由蘭臺而陟樞府八座階崇披
賜錦而臨轅門九邊輝映象天喉舌鳩司之統紀攸
專作

帝股肱麟閣之丹青何忝行且入參帷幄夾輔機衡
扶二曜以常明戢五兵而不用勲勞藏之盟府文武
憲于萬邦社稷靈長寔承昭貺蓬麻桑梓敢藉末光
敬介書郵薄言展賀

賀同年沈中丞擢大理卿啓

時在大梁

恭惟年丈命世文儒挺孤標於嵩雒匡時碩彥振偉
績於旂常敷歷滋深聲施載烈澤靈江海威鬯華夷
操白簡以部崑嶽屹若三門底柱擁雕戈而清鴈塞
巖然千里金城文武足憲乎萬邦勲猷見推於四嶽
帝心簡在台望彌隆 詔自蘭臺晉端棘寺肅 殿
中之直班竝六卿持天下之平司兼五教昔臯陶定

始作士相業光昭於虞廷暨長孺能無冤民頌聲流
布於漢冊卽象刑之倚重占公輔之薦登朝著增輝
生靈嘉賴國倫夙緣天幸叨附制科偶厠同門尤爲
異遇甫切步趨之願優承眄睐之私豈謂岐路解攜
懸心數千餘里遂爾星霜易候屈指二十六年夢寐
爲勞殷勤何自頃執大梁之役咫尺仙廬擬從伊闕
之遊瞻依景範乃畏塗跼蹐尚無班荆道故之期且
塵鞅蹉跎徒有折柳懷人之感但數月兩聞榮命喜
倍恒情而三朝再覲宸居亨符泰運豈以雲泥之
隔能忘縞紵之交爰屬荒辭敬修薄賀伏望披揚赤
素炳耀丹青上結主知聖宣盛美密調元化坐
致雍熙爲一代之具瞻慰八方之共仰

賀中丞陳公擢兵部侍郎留鎮三楚啓

恭惟三山靈淑特鍾命世之才一代言儒素負立朝
之望清風播在仕國大雅振諸詞林首八彥以巡行
所至見稱真御史懷孤忠而獻納因之被遇大聖人
畿甸衡文風教聿新於章甫寢園削牘直聲震懾乎
貂璫爰階九列以翱翔遂竝兩闈而出入蘭臺石室
內綜金匱祕書白筆絳騶外領赤墀章奏部鴈門而
疆場立靖龍塞而鎖鑰彌堅荆楚移營未踰年而

家弦戶頌西陽飛檄甫一舉而電掣星流臨戎有輕
裘緩帶之風鎮靜得休馬弣弓之體毳旃褫魄旋交
臂以乞降鞬譯載塗胥獻琛而輸款息烽煙於繫瓠
而文德載脩錯襄郢於苞桑而歡聲普暢北道新馳
露布南人盡識天威戎衣甫釋於轅門美錦忽頒於
珍筭由柏臺而陟樞府八座增榮握金印以安
帝鄉三苗永格蓋 朝廷方以諸艱試虞相故父老
得以一日借寇君數非偶然恩從特出行且象天喉
舌入參帷幄之謨作

帝股肱用贊機衡之政翊文昌而協德除武庫以藏

兵

社稷靈長寔承休貺山林喘息竝戴末光

端午節三道請劉侍御啓

時行部陳州

恭惟朱明啓候二麥既登繡斧觀風三辰竝麗矧值
天中之令節適臨太昊之遺墟睠結艾而省民安采
靈著而占歲順國倫等叨從法駕竊聽弦歌歡倍閭
閻色增河嶽敢迎台節暫憩古臺聊脩鶩黍之供非
擬鶯花之玩倘蒙俞允無任寵榮

元日三道會請劉侍御啓

時行部陳州

伏蒙台節載駕宛丘三雪占年已順孟陬之紀五雲
獻歲適符太皞之靈瑞啓著叢草木含榮於上日陽

生黍律山川增耀於中州國倫等竊幸元辰叨依法
象家懸神木知百福之從新戶薦辛盤暢四時之協
度敢陳樹柏用效芹葵恭俟俯臨不勝延佇

歲除答各道寅丈見惠節儀啓

時行部許州

恭惟門下海嶽巨靈廟堂重器經文緯武貫古綜今
建節天中坐見五都弦誦分猷洛下居然萬里金湯
國倫猥廁末僚夙欽明德屬當除歲感萍跡之難齊
卽且探春悵柏樽之未偶豈期高義先恤下私節物
頒來珍重五辛之助華緘啓玩輝騰三朔之祥祇含
愧以登嘉聊披忱而寓謝伏願道從陽泰福與時臻

蚤膺鈞軸之司懋建規調之績

陳州端陽候開府啓

伏惟天祚公家篤生名碩

帝懷中土申命撫綏絳騶至而四塞塵清朱鷺揚而
三川沸息恩威交鬯吏士騰歡職等猥備末員仰叨
洪庇方以負韃爲幸猶慚借箸無能頃緣職事驅馳
遂致趨承曠缺自春徂夏斗筭之役未停越宋人陳
台鼎之儀漸遠瞻依莫遂媿悚爲勞今茲鶉首之期
適屆天中之節五兵用辟多福駢臻結艾懸蒲均愜
太平之願紉蘭沐蕙敢忘明德之遺

許州除夕會請察院啓

伏以陽回黍律洪鈞默應於貞元境接芝圖淑氣遙
凝於潁洛恭惟臺下代天巡狩與物同春停軒五鳳
之墟德輝均覽問俗八龍之里風裁獨持節屆迎年
民歌樂歲二室吐明霞而獻瑞萬家塗仙木以從新
國倫等猥以末僚叨從法駕瞻百靈之效職占三朔
之爲祥爰潔辛盤介茲景福乘太史書雲之候慰農
人享臘之私伏俟俞從不勝祈仰

元旦賀開府啓

恭惟臺下澤渥三川勲崇四嶽獻績方新於鼎命迎
年適協乎泰階神燕納新絳騶多福爰紀五雲之瑞
旋增八座之輝國倫等竊在下僚叨承休庇偶執巡
行之役遂愆拜舞之期竊祿知恩捧樹觴而祝頌違
顏思懼瞻柏府以趨趨伏願譽命薦升皇衷簡在川
廣經綸之緒允符天地之交

答灌甫宗正送節啓

伏以玉衡宵燦家迎三朔之祥金柱曉旋運協六符
之泰泐氣延於嵩洛陽春布自闕廷恭惟執事德毓
天中才傾鄴下貯六經於腹笥澄萬境於心源表正
七宗贊堯仁之親睦光揚十廟覃周敬之儀刑振振

麟趾同風翼翼燕謀婉美屆茲元序茂集洪庥縞紵
投交叨晏嬰之久敬韋弦交儆負文舉之忘年幸逐
萍踪再沾蘭臭惜流光之易逝慶佳會以無從節物
頒來珍重五辛之助緘書啓視輝騰二室之奇祇含
愧以登嘉聊抒忱而寓謝伏祈涵照無任屏營

公請鄒大叅啓

時徐司空已葬應得諭祭未行故有此請

恭諗明公學綜今古才豫經綸敷歷四方風猷茂振
旬宣三楚惠澤旁流竊聞父老謳歌用卜朝廷倚
重況忝衣冠之後久承鞭弭之榮頌義方殷望塵彌
切茲有所請匪曰私干興國僻在東隅人才僅方下

里惟是司空徐氏仕爲

先帝舊臣班副六卿家鮮中人之產晚離衆口退崇
高尚之風屢被薦書人情猶艷其推轂自昔初服機
事寢息於懸輿生等雖共鄉閭不敢過爲褒美頃年
下世聞者茹哀

今上錄其遺勞覃加卹典有司管其宅兆責自
天恩乃少牢之賜已頒九原何幸而遣諭之文雖布
三載未沾敬代諸孤略陳初悃敢勞法駕特賁荒丘
使朝廷之德意不虛卽草野之幽靈少慰式閭封
慕古道斯存旌徃勸來士風攸賴

報呂誠齋啓

名家世德江漢同清淑艾端居琅瑤比重豈期寒陋
誤辱寵靈甫申媒妁之言遽允宗祧之託合由天作
感自心藏典禮方稽著龜竝協敢擬新秋三日恭脩
不腆問名是用先期特干典謁

候呂相國啓

恭諭相公閣下以斷斷休休之度佐巍巍蕩蕩之朝
經綸已邁前人進退尤關世教寵方隆而戒滿年未
至而辭榮十疏陳情九重斂色 詔賜安車就第甫
申休沐之期風高解組出都旋被徵還之命上方傳

錫匪三驥之足稱中使慰勞儼六龍之親幸光延楚
粵道重韋䟽縣輿暫息里門俟駕再趨帷幄况綠野
之堂新闢而赤松之志少酬父老望塵山川增價伊
予小子竊在下風偶同洪景之解官適值召公之請
老香山虛社栗里流歡敬迓前旌希垂末鑒

延津請餞劉察院啓

恭惟先生大人攬轡中原河嶽清寧載見旋車北道
旄倪攀望無從巡行報自蘭臺采納藏諸祕室清塵
日遠法從天高國倫等久親台斗之儀側奉經綸之
緒情滋眷戀遇匪尋常敢戒郊郵薄言祖餞伏望旌

詹事府
卷之五十四
三十
麾少駐不惟樽俎流輝

奏記三首

奏記督府

竊聞古之論治者曰功不倍不改器利不百不易法重更張也然有腹心之害坐視之則一日不能安起而更張之則利百而功倍又何可避喜事之名而失時祗禍莫之抹乎本府所部信宜縣萬山聯絡各水徭徭名雖受號其實世逆不悛不惟豕突為殃抑且蠶食無厭占糧一千四百餘石貽害一百三十餘年編民賠贖不休官司處分如戲以致父老轉徙無所

控告請兵勦賊輒以動搖為虞創議蠲糧又謂正供難減因循積蠹以至於今民反以通徭為生官率以苟安為幸制命之權寢削負固之勢益恣愚者既不
能謀智士又多引避然則一邑之生靈可委為秦越一郡之手足可任其痿痺耶況茂名電白諸縣徭人聲勢相倚效尤竊發禍亂益不可支此未必非全省厲階也本職受事以來諮訪籌度頗得其概幸今大勦山巢諸路兵集徭人一時畏威未動然而大兵深入賊首竟逋明係各徭受其買路金錢轉相藏匿意待兵撤即與合勢橫行此本職所以食不下咽非止

爲一郡一縣慮也竊計此輩雖有萬衆分處勢散頗
畏官兵更畏狼兵爲地方畫者不過撫勦二端然必
兵力足勦而後可以言撫若兵力不足徒虞其動搖
而撫之是彼此相欺卒至上下相誤除該縣六豪白
石匿賊巨惡雷福曉雷有方梁文富梁廷鸞已經本
府計禽禁錮檄行諸徭令其捕獻渠魁黃朝泰等贖
罪外其餘猶有不可盡捕及縣官不敢盡言者語云
不一勞不永逸請乞軫念十分困急早賜拯救調發
狼兵五千號一萬檄名將一員領赴本府足以叅兵
五百鄉狼等兵五千以夾攻黎汝誠黃朝泰爲名但
有藏匿接濟者全巢誅之能綁獻首禍者赦之其占
耕信宜糧田者卽移兵恢復之願退田者撫之所復
諸徭田土悉准與狼兵耕種免其租稅三年以示恩
信仍乞 題請照依廣西田州等地方設立土官總
管所屬各州縣狼目則徭以狼制狼以土官制蠻端
永絕法紀昭明糧額如初民困立解不朞月之間而
百年之安可圖也失此不圖恐兵不易集且誅之無
名又未免以動搖爲虞坐待極敝而莫知所措矣本
職痼瘼切身不自知其計之過伏候財察密行之


奏記御史臺

竊念嶺西地方久困劇寇請兵借餉缺望數年自明
臺軫念瘡痍一體援救允增兵餉督責將官士氣因
之奮揚人心益用鼓舞下藍之捷適在陳叅抵任之
初羅叅戴罪之後功有所自天寔相之此後賊遂失
勢分踪東奔西潰又爲颶風摧折羽翼日孤計今不
滿千人逸出海南聞海南業已有備且行晏遊擊躡
追其後似可一舉而殄不復屢殷憂也鴉髻山賊近
又分巢牛韞龍窖二山險不可入日內已趨陳叅與
本府兵竝進鷓鴣賊聞下藍之戰頗畏官兵八月以
來大半遁回陽春深山矣此偵諸被擄之口良非虛
傳且本職分當匍匐赴臺爲闔郡父老 謝援卹之
恩顧又惟大難新解餘孽未銷長吏出境將士必且
懈心恐生它虞取罪益重特陳耿耿差官馳報伏惟
慈諒無任懇切

奏記雷廉兵巡道

屢奉鈞諭極爲疆圉留神海上諸酋業已分踪自潰
一二餘孽窮無所歸薄掠小村望兵而靡稍行清野
之法彼坐困矣此事之在高者皆威靈所暨也至於
雷廉之境晏然按堵如今日則數年所未覩聞寨船
稍有損折不知傷人乎輔車之義安危相倚蓋日夜

不能置於懷矣頃承委以佳稿序文極願執筆但書成於彼而序屬於此迹少相形古之俠士尚不欲從他郡邑奪人賢豪權職亦有取焉伏乞俯亮



[Faint vertical text in the left margin, likely bleed-through from the reverse side of the page.]

[The reverse side of the page is mostly blank with some faint, illegible markings.]

